

Në periudhën pak para zgjedhjeve të fundit mediat maqedonase kryesisht televizionet kanë përfituar mbi 2 milionë euro nga Qeveria. Këto para kryesisht janë përfituar nga televizionet publike si Sitel, Alfa dhe Kanal5, por pjesa tjetër e parave qeveritare kanë shkuar për shtypin dhe portalet elektronike maqedonase.

Gjithçka është përfituar përmes tenderëve të përgatitur, ku mjete në mënyrë simbolike janë ndarë për disa media shqiptare. Akuzat janë lëshuar edhe nga partia opozitare LSDM, e cila ka theksuar se paratë janë derdhur në llogaritë e mediave maqedonase, vetëm 10 ditë para zgjedhjeve. “Vetëm 10 ditë para zgjedhjeve, rreth 600 mijë euro janë lëshuar në llogaritë e Sitel, 230 mijë euro në konton e Alfa dhe 90 mijë euro në konton e Kanal5.

Në periudhën e njëjtë janë lëshuar edhe më shumë se 1 milion euro për agjencitë e marketingut dhe subjektet e tjera juridike si bashkëpunëtore të qeverisë”, theksoi zëdhënësi i LSDM-së, Petre Shilegov. Sipas tij, me këtë qeveria ka korruptuar shumicën e mediave dhe se me këtë po kontrollohen politikat redaksionale të këtyre mediave.

Sipas Shoqatës së Gazetarëve, vetëm tre vitet e fundit janë harxhuar 18 milionë euro nga buxheti qeveritar për reklamat dhe fushatat qeveritare. Gati të gjitha këto mjete janë shfrytëzuar nga mediat maqedonase.